

0 10 20 30 40 50 60 70 80 90 100 110 120 130 140 150 160 170 180 190

Inches
Centimetres

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

傳 682.55
895

木 卷 譜

圖 叢 書 庫

Kodak Color Control Patches



護國天譜

同治辛未
墨寶物於
簾羅趨署

隨園年譜序

記 恂始以應鄉舉之金陵其年爲道光辛卯以幼讀小倉山房詩時耿耿於懷乃一訪隨園行其庭綠陰晝靜水木明瑟悠然遐想其人於葭蒼露白間已又念當日電埽庭訟響答詩筒之槩祇傳之里老或散見他說顧無人焉比其生平始末年爲譜之而今乃得吾子嚴觀察賢弟書而讀焉子嚴天才亮拔筆鋒所向不可一世於前人尤服膺隨園白雲初晴清露未晞空山鼓琴沈思獨往畧彷彿其詩境論者往往目爲隨園後身其慕之切故知之深知之深故綜述其生平始末得毋漏毋溢瓣香所在是固然矣今兵燹後隨園遺址尙有存焉者乎讀此一過不獨綠陰晝靜水木明瑟之况宛然在目卽當年之茨牆翦闔易簷

改塗亦依依如昨日事也

同治十有一年仲冬月朔姍愚兄董恂拜撰



隨園年譜凡例

一是編仿漁洋精華錄選先生詩若干首加以箋註先之以年譜一帙使讀者誦其詩知其人體例應然也竊愧枵腹於先生著作不能稍窺門徑特以十餘年用力於斯不忍自沒辛苦耳他日傳文苑循吏者自有人或以此作嚆矢之貽實所深幸若云纂述則吾豈敢

一先生一生事蹟散見詩文全集閱之似易而薈萃貫串實難今以詩集編年為綱而於文集詩話中所記述悉心考證書其行誼之大者其餘瑣屑不關輕重之事概從刪削後之讀隨園詩文者知先生為人庶幾不為迂曲小儒所惑

一先生四官縣令所至輒著循聲第生平從不自炫八十

自壽詩云休誇往日與人誦風影訛傳五十年在他人難得之事先先生直淡漠視之此益品誼最高處不欲自矜伐也卒後七十餘年惟惜抱軒爲誌墓澄清堂爲立傳他無聞焉茲編亦但就誌傳中所載政蹟敘列此外傳播人口者不復屢入以存先生之真

一先生小時最爲祖母鍾愛讀其登第歸杭隴上五言長律孝思諄摯一字一淚按先生祖母柴氏僅一見於新齊諧中惜濬師五赴江南鄉舉屢遊隨園未暇訪先生孫曾一詢其家乘也

一詩文集中詩話中間有訛誤者想係先生晚年隨手刪訂不復記憶如適蔣氏女後其壻四年亡詩話中作未半年女與壻俱亡己酉得落花扶不上枝頭句以爲金

姬讖而金姬實卒於壬子至辛亥以後詩編舛誤更多三十五卷當是甲寅作而列入乙卯按其題目實皆甲寅年事茲就所確知者一一改正俾覽者不致生疑

一先生女壻可考者蘇州蔣氏溧陽史氏六合汪氏至尺牘所載宜姑嫁孔雱谷之子吳選八家四六所載先生壻藍嘉縉均未見詩文集中未便妄列

一林薌溪射鷹樓詩話載先生女孫詩數聯足徵家學淵源卽閨閣中亦代有繼起者惟茲編斷自丁巳以前餘均付之闕如深恐考證不真轉滋口實識者鑒之

庚午仲冬定遠方濬師識

考士師祿先生次女先生生於東園大樹巷中

康熙五十六年丁酉先生二歲

康熙五十七年戊戌先生三歲

康熙五十八年己亥先生四歲

康熙五十九年庚子先生五歲

先生秋夜雜詩云我年甫五歲祖母愛家珍抱置老人懷弱冠如閨人其時有孀姑亦加鞠育恩授經爲解義噓背分餘溫按先生孀姑適沈氏先生剪髻時好聽長者說古事否則啼姑爲摺摭史書稗官兒所能解者呢呢妮妮不倦以故未就學而漢晉唐宋國號人物略皆上口每讀盤庚大誥眉蹙姑爲負劍辟咄助其聲以熟

康熙六十年辛丑先生六歲

康熙六十一年壬寅先生七歲

遷居葵巷受論語大學於史玉瓚先生中

雍正元年癸卯先生八歲

先生太翁客吳中聞衡陽令高君清卒庫虧妻子繫獄歎曰我高公幕客也非我往則難不解遂治裝歷洞庭而南告其弟高八曰曩而兄傾庫供上官吾嘗止之而兄不可則勸其簿籍而加印焉亦知正爲今日計乎高悟檢篋得印簿訴制軍爲平其事楊朗溪太史贈詩有袁夫子當今真義士句

雍正二年甲辰先生九歲

先生詩話云余幼時家貧除四書五經外不知詩爲何物一日業師外出其友張自南先生攜書一冊到館求

售留札致師云適有急需奉上古詩選四本求押銀二
星實荷再生感非言罄余舅氏章升扶見之語先慈曰
張先生以二星之故而詞哀如此急宜與之留其詩可
不留其詩亦可予年九歲偶閱之如獲珍寶始古詩十
九首終于盛唐俟業師他出及歲終解館時便吟咏而
摹倣之

偕同人遊杭州吳山作五律得句眼前三兩級足下萬
千家又詠盤香云空梁無燕泥常落古佛傳燈影太孤

雍正三年乙巳先生十歲

雍正四年丙午先生十一歲

雍正五年丁未先生十二歲

受知於學使王交河先生補博士弟子員與業師史先

生及張有虔同入學

雍正六年戊申先生十三歲

先生詩云我年十二三愛書如愛命每過書肆中兩腳
先立定苦無買書錢夢中猶買歸至今所摘記多半兒
時爲

雍正七年己酉先生十四歲

雍正八年庚戌先生十五歲

受知李安溪先生

清植

補增廣生

有詠懷詩云也堪斬馬談方畧還是騎牛讀漢書春柳
詩云新絲買得剛三月舊雨吹來似六朝贈炙人口先
生嫌爲少作集內悉刪去

雍正九年辛亥先生十六歲

雍正十年壬子先生十七歲

杭州朱端士先生命製七十壽序結忘年交

雍正十一年癸丑先生十八歲

先生以制府觀風受知於程公

元章

命肄業萬松書院

其時山長為楊文叔先生

繩武

呈所作高帝郭巨二論

請誨文叔墨其後云文如項羽用兵所過無不殘滅汝

未弱冠英勇乃爾先生自是銳意述作文叔啟之也

與杭州仲燭亭同學為詩彼此吟成便携袖中冒雨欣

賞

雍正十二年甲寅先生十九歲

帥蘭臯先生

念祖

督學浙江試古學先生賦秋水云映

河漢而萬象皆虛望遠山而寒烟不起帥公大加賞異

又問國馬公馬何解先生對云出自國語註自韋昭至
作何解枚實不知納卷時帥公閱之曰汝童年能知二
馬出處足矣曰國馬公馬之外尚有父馬汝知之乎曰
出史記平準書曰汝能對乎曰可對母牛出易經說卦
傳帥公大喜拔置高等食廩餼

雍正十三年乙卯先生二十歲

帥學使按試先生名居前列幕中閱卷者邵君昂霄也
後相遇西湖誦其有所贈云韻到梅花香有骨軟於楊
柳怯當風先生有知己之感載其句入詩話中

乾隆元年丙辰先生二十一歲

適陸氏寡姊攜二甥來歸寧遂止焉

省叔父于廣西寓中丞金公鉉署中作銅鼓賦合座稱

賞時方開博學鴻詞科中丞首以先生列薦剡遂北上

胡稚威天游初見先生謂曰美才多奇才少子奇才也

年少修業而息之他日為唐之文章者吾子也

冬試鴻詞科報罷落魄無歸飯高怡園先生景蕃家三

月有餘

句容王郎中琬招先生往與其兒子讀書王公旋守興

化同客王公所趙再白舍人貴朴奮然曰子無憂王公

雖去其屋吾賃之因留先生共臥起出詩文相與礪切

未幾先生受嵇相國聘乃與舍人別

在李玉洲先生家與曹麟書沈椒園諸公結吟社臨川

李穆堂侍郎以文章名先生袖所作請業侍郎極愛李

德裕論一篇大書卷首云洗盡唐鑑中腐語得此痛快

淋漓之作真不覺前賢畏後生矣

唐公莪村時官太常卿賞先生詩文託其西席朱君佩

蓮道意欲以女妻之先生以聘定辭唐公甚惋惜

先生上孫文定詩云一囊得飽侏儒粟三上應無宰相

書文定讀之忻然延入曰滿面詩書之氣

乾隆二年丁巳先生二十二歲

先生落魄長安金陵人田古農見而奇之哀其饑渴沽

酒為勞後先生宰江甯古農已歿有詩告其墓

乾隆三年戊午先生二十三歲

先生袖文質趙公大鯨公大奇之因乞一授餐所公唯

唯朝送公出暮聘已至蓋嵇相國璜家相國子承謙時

方七齡執經問業

秋舉順天鄉試出四川鄧遜齋先生 時敏房

乾隆四年己未先生二十四歲

孫牧堂太史延先生權記室

會試成進士改翰林院庶吉士

先生少夢老僧導入一山穹窿高峻直登其巔

僧曰此點蒼山也多白猿各據一石洞棲僧指一空洞示曰此是汝宅久當來還本科先生房師閣學蔣公適

夢白猿入贊榜發大喜大學士鄂文端公謂蔣公曰今年聞後閣人文所卜悉不讐惟袁枚一人驗耳非君誰

光我顏者按是科與先生同試鴻詞同舉京兆同入詞館者二人長洲沈歸愚尚書桐城葉書山庶子也

乞假歸杭迎娶孺人王氏

先生朝考賦因風想玉珂詩欲刻劃想字有句云聲疑來

禁院人似隔天河大司馬甘公以語涉不莊將擯之尹文端公繼善亦與閱卷力爭曰此人肯用心思必少年

有才者特未解應制體裁耳此庶吉士之所以須教習也倘進呈時上有駁問我當獨奏遂入選先生受文

端公知自此始乞假時繪玉堂歸娶圖遍徵題詠武進程文恭公景伊詩云金燈花下沸笙歌寶帳流香散綺

羅此日黃姑逢織女漫言人似隔天河蓋調之也

乾隆五年庚申先生二十五歲

攜王孺人北上黃流風浪中遇錢稼軒少司空後先生

贈少司空女詩云爾翁南下賦歸歟值我新婚北上初

水面匆匆通一語懷中正抱女相如

叔父健磐府君卒於粵西按先生詩話健磐公卒時香

亭弟年纔十歲據此則健磐之卒適在庚申年也甲子

有哭健磐詩乃歸其喪耳

乾隆六年辛酉先生二十六歲

乾隆七年壬戌先生二十七歲

是年翰林散館試翻譯置下等閱卷大臣鄂文端公所定也啟名大恨召先生往賜飯與深語且曰汝為外吏必職辦先生問及當代諸名臣文端云汝到江南有一

真君子不爲利動不爲威懾守其道生死不移者可交也問何人曰顧琮也我此時不必通書汝見時但道是我門生渠必異目相待先生到淮見顧公於總河署中果如舊相識臨別先生求顧公教誨公曰君聰明任君行去但要大處錯不得可緊記老夫語先生歎爲真儒者之言

時 上命保薦陽城馬周一流人留松齋侍郎

留保命

公擬時務奏疏一通大加矜寵卽欲以先生應 詔疏

已具矣先生以外用喜得薄俸養親苦辭乃止

桐城張藥齋侍郎聞先生改外向其兄文和公作元相

語曰韓愈可惜

需次白門寓王侯巖太史家

初試溧水知縣太翁自廣西來慮先生年少不諳吏治乃匿姓名詢諸塗有女子告曰吾邑袁公政若神明真好官也太翁大喜騎驢直入縣署合邑傳爲佳話

乾隆八年癸亥先生二十八歲

由溧水改知江浦復從江浦改知沐陽值旱先生作苦
災行六月二十一日詩成二十三日卽得大雨

赴顛榆鞠獄

沐陽有吳某就館洪氏妻昏夜被殺主名不立洪氏子與其奴互有誣先生屢訊不決遂成疑獄偶與何獻葵刺史言及刺史曰此獄固難辨然君亦未盡心先生問故刺史曰君何不將二囚合繫之陰使人察其所言再分繫之使人爲鬼嘯以休之或真情可得先生憮然若

失悔計不出此也

乾隆九年甲子先生二十九歲

知沐陽縣

秋充江南鄉試同考官得士七人李太史

英

與焉按先

生試鴻詞科在都會大會詩人常州儲學坡

師載

年最

長爲坐中祭酒後三十年儲乃出李太史門下是科薦

而不售者一爲松江陳邁晴一爲太倉吳維鶚陳故宿

學榜後作百韻詩來謁吳爲梅村先生曾孫少年玉兒

嗣登癸酉賢書均早卒

先生歸季父健磐府君柩於廣西哭之以詩

女弟素文于歸如臯高氏

縣試童子周某疑其文偵之乃其師呂文光作也先生

傾衿禮之嗣延至江甯課兩孤甥孺人王氏復妻以妹

呂君成丁丑進士官至直隸同知

乾隆十年乙丑先生三十歲

調江甯縣知縣

五月十日天大風白日晦冥城中女子韓姓者年十八

被風吹至銅井村離城九十里其村氓問明姓氏次日

送其還家女婚東城李秀才子李疑風無吹女子至九

十里之理必有姦約控官退婚先生曰古有風吹女子

至六千里者汝知之乎李不信先生取元郝文忠陵川

集示之其詩云黑風當筵滅紅燭一朶仙桃落天外梁

家有子是新郎芊氏負從鍾建背爭看燈下來鬼物雲

髻欹斜倒冠佩又云自說吳門六千里恍惚不知來此

地甘心肯作梁家婦詔起高門榜天賜幾年夫婿作相
公滿眼兒孫盡朝貴李無以應先生復曉之曰郝文忠
一代忠臣豈肯誑語但當年風吹吳門女竟嫁宰相恐
此女無此福耳李大喜兩家婚配如初制府尹公聞之
曰可謂宰官必用讀書人矣

乾隆十一年丙寅先生三十一歲

知江甯縣

五月捕蝗七里洲馬爲野豕所驚怒逸不止先生強勒
之馬竄入廢寺門欄橫木馬可入而馬上人必折頸以
死矣先生念死可也如此慘死人必疑有隱慝此念甫
動馬逸忽止若有人攬之者先生從容跨馬牽縛樹間
良久輿從始踉蹌來

乾隆十二年丁卯先生三十二歲

知江甯縣

題升高郵州知州格於部議不果

初得隨園先生有詩云暫時邀主先爲客異日將官易
此園

江甯方山谿洞外兩岷爭地無契券訟久莫能斷先生
視案山積笑曰此左氏所謂宋鄭之間有隙地頃邱玉
暢是也訟久則破家吾爲若了之乃盡去舊案別給符
驗使各開墾有賈人販布江行舟觸戰船溺死一兵眾
兵縛控舟子并及布客先生知過失殺人無罪而累客
必傾貲乃令乘風張帆作觸舟狀縱之去以埋葬錢發
兵完案侍郎尹會一督學江南試江甯時有兩騎衝其

前麾且慢罵稱親王家奴先生立擒治則爲將軍投書制府者也搜其篋得關節書十餘封悉焚之重責逐去乾隆十三年戊辰先生三十三歲

知江甯縣

江南災銅井民運米至吳門有率眾劫之者先生以荒政當弛刑召其魁詢之乃土人暹糶非劫也諭以情法追米還之

江甯高廟僧亮一工栽菊能月月有花席武山別駕邀先生與蔣用庵侍御姚雲岫觀簪同往賞之分韻賦詩秋解組歸隨園按隨園記云金陵自北門橋西行二里得小倉山山自清涼胚胎分兩嶺而下盡橋而止蜿蜒狹長中有清池水田俗號乾河沿河未乾時清涼山爲

南唐避暑所盛可想也康熙時織造隋公當山之北巔構堂皇繚垣墉樹之荻千章桂千畦號曰隋園因其姓也後三十年余宰江甯園傾且頽弛其室爲酒肆問其值曰三百金購以月俸茨牆剪闔易簷改塗仍名曰隨園同其音易其義落成歎曰使吾官於此則月一至焉使吾居於此則日一至焉二者不可得兼舍官而取園者也遂乞病率弟香亭甥陸湄君移書史居之

乾隆十四年己巳先生三十四歲

乾隆十五年庚午先生三十五歲

乾隆十六年辛未先生三十六歲

乾隆十七年壬申先生三十七歲

先生起病入都引 見大學士傅公引至軍機房背履

歷來保公亦在坐傅公問兩江總督尹公繼善黃公廷桂孰賢先生曰枚小臣也何敢論兩大人優劣但外所傳尹公爲政寬黃公爲政嚴者皆誤也傅公愕然問故先生曰尹公遇下屬有禮貌多體恤語故人以爲寬及犯大不韙必劾雖司道不能求故曰嚴黃公遇人倨傲呼叱隨意然頗多縱捨常漏吞舟之魚故曰寬傅公又問寬與嚴孰愈先生曰尹之嚴可以得君子黃之寬只可用小人語未畢來公在傍笑曰汝以君子必爭禮貌而小人甘受呵斥故耶先生曰然來公以手拍几曰好伉爽南蠻子豈不將尹黃兩大人神形都畫出乎然足下胸襟亦可想見矣旋發陝西路過保陽方敏恪公時爲直隸總督謂清苑令周燮堂曰袁某循吏也雖宰江

甯省會而能盡心民事汝等任首縣者宜以爲師秋丁父憂歸遂乞養母不復出先生太翁精刑名之學爲一時推重其議論見先生答金震方問律例書

乾隆十八年癸酉先生三十八歲

梓人武龍臺長瘦多力隨園亭榭半成其手七月十一日病卒先生念其無家爲棺殮瘞於園之西偏

乾隆十九年甲戌先生三十九歲

八月十九日先生抱病至除夕未理髮

側室陶氏亳州人工棋善繡癸亥來歸生女名成姑八月四日陶病亡

葬業師史先生中於西湖之葛嶺

高先生守村訪先生于白下解孔孟專攬秘宋儒有心

得者先生灑然異之

終養文書已准部覆

編詩十卷

乾隆二十年乙亥先生四十歲

移家入隨園

乾隆二十一年丙子先生四十一歲

還武林過葵巷舊宅有詩紀事

九月先生患暑瘧早飲呂醫藥至日晡忽嘔逆頭眩不止其太夫人抱之起覺血氣自胸膈起命在呼吸有同徵友趙藜村來訪家人以疾辭趙曰我解醫理乃延入診脈看方笑曰易耳速買石膏加他藥投之甫飲一勺如以千鈞之石將腸胃壓下血氣全消未半盃沈沈睡

去額上微汗朦朧中聞太夫人喞曰豈非仙丹耶睡須臾醒趙君猶在坐問思西瓜否曰想甚卽命買西瓜曰憑君盡量我去矣食片時頭目爲輕晚便食粥次日趙君來曰君所患陽明經瘧呂醫誤爲太陽經用升麻羌活升提之將妄血逆流而上惟白虎湯可治然亦危矣未幾趙君歸先生送行詩云活我固知緣有舊離君轉恐病難消

乾隆二十二年丁丑先生四十二歲

乾隆二十三年戊寅先生四十三歲

甥韓執玉幼通十三經年十三舉茂才與先生舉茂才

時僅差一歲喜以詩贈

執玉更名琮琦

四妹雲扶于歸揚州汪氏

六月二十九日陸姬生男不舉

乾隆二十四年己卯先生四十四歲

作諸知己詩王公蘭生居首殿以李秀才名世共十三人

十一月三妹素文卒素文名機嫁高氏子者夫無行訟之官而絕之

是年江南鄉試丹陽貢生何震負詩一冊踵門求見年五十餘自云苦吟半生無一知己如先生亦無所取將投江死矣先生駭且笑為稱許數聯何大喜而去黃星巖戲吟云虧公寬着看詩眼救得狂人蹈海心

乾隆二十五年庚辰先生四十五歲

女阿珍生

韓錫琮琦卒

乾隆二十六年辛巳先生四十六歲

乾隆二十七年壬午先生四十七歲

尹文端公時督兩江嫌先生踪跡太疎先生呈詩云不
是師門意懶行尙書應諒草茅情聽來官鼓心終怯換
到朝靴足便驚老眼書銜愁小字詩人得寵怕虛名間
時每看青天月長恐孤雲累太清一生品詣於此可見
弟香亭樹舉京兆試

嫁女于蘇州蔣氏

乾隆二十八年癸未先生四十八歲

香亭會試成進士出宰正陽

婿蔣某卒

乾隆二十九年甲申先生四十九歲

二月初八日生女十一月十八日又生一女

先生五弟卒

按先生同祖弟尚有阿三皆香亭胞弟名字亦無攷

有詠刀詩云出匣一條水寒光射眼來非關報仇事生

就殺人才夏伯音藏無名氏先生詩註云聞先生在尹

文端公座上有江南吏極力傾軋同官者文端出一七

首屬吟先生卽刻作此其人見詩大驚咋焉

乾隆三十年乙酉先生五十歲

先生二姊子陸湄君

建卒爲刊其詩

乾隆三十一年丙戌先生五十一歲

先生左臂忽短縮不能伸諸醫莫效控舟至洞溪訪徐

靈胎徐贈以丹藥一丸服之而愈

乾隆三十二年丁亥先生五十二歲

二月適蔣氏孀女成姑卒哭以詩有獨活草生原命薄

未亡人去轉心安句成姑側室陶氏出也乾隆己卯陳

竹香自都來爲議婚所議者曹來殷舍人先生已諾矣

蘇州蔣誦先剔剔不已遂辭曹而嫁蔣未半年蔣壻亡

是年成姑亦亡按先生詩話作未半年女與壻俱亡誤

作續詩品三十二首

冬葬三妹素文於上元之羊山爲文以祭

乾隆三十三年戊子先生五十三歲

德州盧雅雨先生

見會

家居八年以兩淮運使提引事

下獄死先生有十月四日揚州吳魯齋明府招同王夢

樓蔣春農金櫻亭遊平山堂卽席詩蓋弔雅雨先生作

也雅雨孫相國文肅公每讀此詩輒涕泣數日王褒門人廢蓼莪章有以哉

女阿良卒先生哭之慟蔣荅生太史慰之以詩

三月二十四日又生一女

香亭姬人韓氏生一子從南陽寄信來云嗣先生

乾隆三十四年己丑先生五十四歲

劉文清公守江甯以風言欲逐先生先生聞信偏不走謁逾年文清託劉廣文要先生代作江南恩科謝表備申宛款文清旋擢觀察先生贈以五古一章末云公以天人姿而兼宰相胄高如冰鑑懸那有吞舟漏寧可失之詳慎毋發之驟又云氣斂心益明業廣福彌厚益規之云

十二月十六日葬封翁於隨園之北僅百步按先生隨園六記云先君子卒於江甯欲歸葬古杭慮輿機之艱不果有形家來議園西爲兆域者余聞往視則小倉山來脈平遠夷曠左右有甌隙岸屈草樹覲髮封以爲塋宰如也遂請於太夫人扶柩窆焉

女阿珍是年十歲先生有詩云阿珍十歲髻雙丫又讀詩書又繡花娘自怒嗔爺自笑不知辛苦爲誰家按此阿珍當生於庚辰

乾隆三十五年庚寅先生五十五歲

楊宏度自邛州來先生以女阿能寄楊膝下

尹文端公薨於位先生作六十韻詩哭之末云羊曇腸斷後永不過西州蓋一生知遇之厚無過於文端也陳

文恭公亦於是年薨逝文恭嘗問先生某頗悔疾惡太嚴先生對曰公言未是如果惡耶疾之嚴亦何妨所慮是過也非惡也又恐悞善爲惡則嫉之且不可而况嚴乎文恭悚然謝

妹秋卿卒

乾隆三十六年辛卯先生五十六歲

乾隆三十七年壬辰先生五十七歲

方姬卒年四十九撰聰娘墓志

乾隆三十八年癸巳先生五十八歲

乾隆三十九年甲午先生五十九歲

湖州淘井得銅印鐫簡齋二字陽文深一米許宋蒙泉明府以先生字偶同遂以相餉按宋史陳與義字簡齋

會刺湖州此印實陳公故物也

沈凡民葬金陵南門外湯家窪先生因其無兒爲權墻祭有詩云君葬十三年我來如一日

乾隆四十年乙未先生六十歲

十月十四日嗣弟香亭子爲己子取名通

編全集六十卷高麗使臣樸齊家等曾以重價購之

乾隆四十一年丙申先生六十一歲

座主鄧遜齋廷尉卒按戊午科先生與文成公阿桂同出廷尉門廷尉每稱分校得士一文一武云

乾隆四十二年丁酉先生六十二歲

香亭丁內艱服闋赴蜀中別駕作五古七章送之按香亭以親老呈改近省應坐補四川甯遠缺

納側室鍾氏

乾隆四十三年戊戌先六十三歲

二月九日先生母章太孺人棄養年九十有四

七月二十三日子阿遲生遲為側室鍾氏出時先生族

弟春圃觀察鑒在蘇州句當公事接江甯方伯陶君飛

遞文書意頗驚駭拆之但有紅箋十字云令兄隨園先

生已得子矣常州趙映川舍人賀以詩云佳問有人馳

驛報賀詩經月把杯聽

乾隆四十四年己亥先生六十四歲

掃墓杭州轉運使陳藥洲夫人為李存存先生女見先

生名紙驚曰此五十年前先君門下士也先生贈藥洲

詩有人席東南名士滿通家姓氏小君知句

香亭官江甯南捕通判

乾隆四十五年庚子先生六十五歲

香亭擢廣東太守

乾隆四十六年辛丑先生六十六歲

二月嫁女鵬姑于溧陽史氏壻名培輿抑堂侍郎六子也

沈省堂觀察垂老添一女與先生子遲結婚觀察常戲

先生曰子但能欺人不能欺天先生驚問曰子性儻葛

口無擇言人道是風流人豪耳及省其私內行甚敦與

外傳聞者不符豈非欺人乎然而造物暗中報施不爽

使子衰年有後終身平善豈非不能欺天乎識者韙之

仿元遺山論詩得六十八人獨不及沈歸愚尙書

乾隆四十七年壬寅先生六十七歲

遊天台登華頂作歌到石梁觀瀑布賦天台桃花源詩
歸途過虹橋倪姓家其西席張孝廉正宰請見色甚倨

見先生意不甚屬夸其先人元彪最知名曾與袁子才
商寶意兩公交好先生問君曾見袁某否曰袁在年將
大耄安可見耶先生告以某在斯乃愕然下拜

小住齊次風宗伯家宗伯久歸道山其弟周南世南出
宗伯集屬訂

觀大龍湫至靈峯洞旋由館頭呼蘿蔦船渡江至永嘉
瞻謝康樂像觀瀑石門謁劉青田祠堂至縉雲黃碧塘
將宿店矣望前村瓦屋緩步焉主人虞姓迎入茗飲與
語不甚了還寓將眠聞戶外人聲嗷嗷詢之則虞姓兄

弟齊來問先生可卽袁太史乎曰是也乃手燭照拜且
詫曰吾輩都讀太史文以爲國初人今年僅逾花甲是
古人復生矣豈容遽去相與昇至其家供張甚具次日
陪遊仙都虞氏主人名沅字啟蜀爲唐永興公後人是
行也以正月二十七日出門五月二十七日還山

乾隆四十八年癸卯先生六十八歲

遊黃山到新安雄村曹侍郎園同顧厓太史泛舟小南
海未訪吳冠山先生賦詩奉寄登齊雲冒雨至黃山湯
口宿慈光寺觀前明萬厯宮中賜普門和尚袈裟金鉢
端午至立雪臺望前後海諸山上蓮花峯遣人登頂取
香砂歸途宿陵陽鎮有甯氏者族八千人云自光武時
卜居至今未曾他徙先生贈以詩泛舟齊山過文選樓

弔昭明太子至安慶拜余忠宣公墓登大觀亭自四月六日出門至六月五日還山

先生女琴姑于歸浦口汪芷林刺史子婦刺史爲先生

戊午同年

乾隆四十九年甲辰先生六十九歲

子遲入學讀書

香亭時守肇慶花朝後作嶺南之遊由長江上泝登小姑峰泊石鐘山至廬山讀王文成紀功碑觀瀑香爐峯過柴桑亂峰中躡梯觀陶公醉石上五老峰從萬松坪東下一路冰條封山抵南昌蔣苕生先生力疾追陪作平原十日飲遂登舟從萬安至贛州歷十八灘遊南安了山度梅嶺遊丹霞錦石巖順流南下遍覽觀音巖瀆

陽峽飛來寺諸奇勝四月抵肇慶遊披雲樓寶月臺七星巖均有詩啖新興荔支訪孫補山中丞於廣州復探西樵羅浮各勝境至江門謁陳白沙祠守祠者以明宣宗聘玉見示歸遊頂湖遂西上重至桂林詢金德山中丞舊事惟劉仙菴僧恆遠尙能言其顛末路過瀟湘宿永州太守王蓬心署訪愚溪鉅錡潭旋遊南嶽登祝融峯觀日出過洞庭湖再題賈太傅祠看雪黃鶴樓臘底阻風彭澤在舟中度歲有自遣詩次年正月十一日還山計行程一萬三千餘里

乾隆五十年乙巳先生七十歲

乾隆五十一年丙午先生七十一歲

香亭以十二年前攝霍邱縣篆失察民人陞科舊案部

議降調奉 旨送部引見

程魚門太史卒後妻孥無以爲養先生爲致書畢秋帆制軍慨然籌三千金交桐城章淮樹代主營運太史舊欠先生五千金先生焚其券人稱風誼至是復作畢尙書撫孤行推美於畢公不自居功也

八月二十八日出遊武夷過仙霞嶺宿漁梁觀崇安署中趙清獻手種梅到武夷宮登幔亭峯從大王峰下乘舟入溪探九曲登天遊一覽樓覽武夷全局回舟玉山過七里瀧再到杭州埭墓歸

乾隆五十二年丁未先生七十二歲

先生於雍正丁未入泮至是周花甲矣作重遊泮宮詩中云已入鬢宮換短褐更教雀弁耀銀光按各官帽上

加珊瑚水精諸頂生監用銀始於雍正四年也
造生壙成

乾隆五十三年戊申先生七十三歲

十月重遊沐陽宿呂嶧亭觀察家自甲子至戊申四十五年矣有過虞溝題虞姬廟詩虞姬沐陽人也

乾隆五十四年己酉先生七十四歲

二月八日夜先生夢老僧入門長揖賀曰二十二日將還仙位問是何年月日曰本月也少頃又一道士如僧所云竟不驗

秋先生病金姬亦病先是先生得句云好夢醒難尋枕畔落花扶不上枝頭自嫌不祥劉霞裳曰先生非花也其應在金夫人乎壬子金果亡

乾隆五十五年庚戌先生七十五歲

春掃墓杭州寓西湖孫氏寶石山莊臨行賦詩云一盃

麥飯手親攜走奠先塋淚滿衣生怕歐公遷潁上瀧岡

阡畔紙錢稀入城要訪舊知交牀上人危塞上遙

一病危吹斷山陽一枝笛此身雖在已魂銷孝思交誼

至老益篤

腹疾久不愈作歌自輓遍索和詩

乾隆五十六年辛亥先生七十六歲

三十年前相士胡文炳相先生六十三生子七十六考

終後果於六十三歲得子其年恰符文炳所云之數至

除夕不驗乃作告存詩按是時先生姊長先生七歲孺

人王氏亦七十又五故先生詩云八十三齡阿姊扶白

頭內子笑提壺倘非造化丹青手誰寫隨園家慶圖奇
麗川中丞鑄白玉印兩方見贈一日倉山叟一日乾隆

壬子第一歲老人

乾隆五十七年壬子先生七十七歲

八月二十七日姬人金氏卒

乾隆五十八年癸丑先生七十八歲

子通就婚杭州

乾隆五十九年甲寅先生七十九歲

花朝前一日先生赴友人三遊天台之約

乾隆六十年乙卯先生八十歲

作八十自壽詩一時和者麇集程愛川

云百事早為他日計一生常看別人愁和朝字韻云八

千里外常扶杖五十年來不上朝爲先生稱賞
到溧陽看女鵬姑再宿紅泉書屋

子遲就婚茗溪沈氏再送香亭弟之廣東

嘉慶元年丙辰先生八十一歲

重九日埽凡民先生墓先生年逾八十祭畢愴然賦詩
與訣有過來兩個十三年句

十二月朔日先生得孫通所出

嘉慶二年丁巳先生八十二歲

病痢甚劇老友張止原以所製大黃相餉先生毅然服
之三劑而愈

六月舊痢又作

作後知己詩自福文襄至織織女士共十一人

就醫揚州按吳山尊先生倉山外集題詞云嘉慶丁巳
余僑寓揚州先生已病渡江來就醫寓張氏園中先生
以文伏一世所至傾倒貴遊扶將單門雲挾岱潤風藉
春溫其道旣廣門牆襍進一技之微星士畫工皆附尾
借羽車馬填門珍錯承筐公讌客集各道淵源以自誇
異先生每謂其壻藍嘉璫曰山尊不願在弟子之列而
余集中四六文衣鉢當授之
九月二十夜病又作賦絕命詞并賦留別隨園詩有我
本楞嚴十種仙謁來遊戲小倉巔句十一月十七日先
生卒嘉慶三年十二月乙卯葬小倉山北耐先生父母
墓之左



